



Iohannes Philippus ex illustri familia comitum Ringrauiorum natus, & in omni genere uirtutum educatus est. Is cum adoleuisset, ob magnam corporis fortitudinem armorum studia dilexit, atque principum & regum castra sequens, magnam sibi auctoritatem comparauit. Vnde postea ordines duxit, & Germanis militibus semper gratissimus extitit. Cum autem Euangelij doctrinam amaret, Anno post natum Christum millesimo quingentesimo quadagesimo sexto in bello Smalkaldico sese Protestantibus coniunxit, & strenuam operam illis praestitit. Itaque Carolus Imperator, cum Ioannem Fridericum Electorem

Saxoniae coepisset, & eam regionem pacasset, ab ea pace Ringrauium, Mansfeldium, & Recrodum (qui Saxoni militarant) exclusit, atque Anno millesimo quingentesimo quadagesimo octauo in Augustanis comitijs proscripsit. Id cum Iohannes Philippus cognouisset, sese ad regem Galliae Henricum contulit, & eius partes plurimum auxit. Postea quoque Anno millesimo quingentesimo quinquagesimo secundo cum rege, Gallorum peditum praefectus, ad Rhenum accessit, & Carolo Caesari plurimum obfuit. Hinc factum, ut Galliae rex Ringrauium multis opibus locupletarit, & plurimum dilexerit.